

谷園續集序

朝霞

李天馥

謨



曩余官翰林公餘多暇與阮亭鈍翁悅巖諸君子朝夕論文商確言無虛日語及人物往往爲余言少宰宛委夫子嗣君智脩天才敏妙落筆驚人詩思清新不愧作者每於酒闌屬句時輒贊不去口余亦間得其片語短什諷詠歎賞以爲可登大雅之壇然僅僅窺其一斑終未獲觀其全豹也智脩弱冠即以



才能著公卿間由駕部郎出爲觀察使歷齊楚晉今  
且廉察中州矣所在皆赫赫有聲望余聞之頗爲欣  
惔然終未嘗把臂論詩也迺今自臬署以谷園全集  
郵寄示余余展卷誦數過不禁歎興曰智脩何富於  
才如是耶彼之士鏤肝鐫腎偶得一二警句便  
掀髯獵襟高吟自詡覽其全編浮濫冗闕覆瓿貽譏  
楓落致誚讀智脩之詩能不驚赧汗泚耶凡海內留  
心風雅者固不服膺矧余通門世好有不爲之擊節

876004  
April 8, 1986

稱快者乎其前集有阮亭諸公標其雋賞其奇矣觀  
其續集乃更如初日芙蓉婀娜鮮麗也如春月楊柳  
濯濯姿韻也如入山陰道上煙霞變幻也如遊金谷  
園中翠鈿正運繽紛也有西園開宴之風流有

北里撝筆之豪致有廊廟莊嚴冠裳劍珮之從容有  
灞陵風雪驢背逍遙之逸趣吟口迴環應接不暇非  
富于才詎能至是余嘗讀息遊堂集每欲空前軼後  
難乎爲繼智脩之詩洵足以媲美先人家學淵源於



茲益信矣智脩年裕才豐出其智力日增而上文章  
宦業又何餘憾吾且拭目以俟智脩之紹遺緒而潤  
鴻猷區區聲律之妙奚足以竟其蘊然而新詩日又  
多矣

谷園續集序

商丘 宋 肇 謨

自昔人有文章一小技又餘事作詩人之言而世之  
稱詩者乃 流連景物當之陋已余常以謂詩之  
理甚深而其所係甚鉅傳曰詩之也志之所之也記  
曰世子生三日卜士負之詩負之詩之言承也又詩  
者持也言作者承君政之得失述已志而作詩而又  
以持人之行使不失墜也亡論三百篇所載忠臣孝



子名卿賢大夫所稱述讀其詩可以得其時之盛衰  
治亂與其人之賢否即令同時之人一卷之詩而無  
不可因之以得其爲人茨邨胡公爲少保宛委先生  
似君自郎署歟歷外藩聲稱藉甚令方膺

簡命以觀

吾豫三年於茲平反明恕豫民自以

爲不冤訊牘清暇益力爲詩歌謬以余知詩郵所爲  
谷園續集屬余序余得卒業焉讀南發展墓忌日諸  
什而信公之爲孝子也讀新樂行溫公集題後諸什

而信公之爲名臣也讀路村行飛蝗行諸什而信公  
之施於政事也豈弟而潔廉讀登眺投贈懷人諸什  
而信公之於山水友朋也曠而摯情逸而思深予辱  
交公久知公今日而刺刺云然蓋亦自幸余言之  
不妄而世之區區以流連景物稱詩者果陋而亡  
當也少保公當

世祖章皇帝時入叅密勿出佐銓衡而年不配德未  
及枋用公異日者紹揚前休行將賡天保而矢卷阿



以颺邦家之盛以繼三百篇之軌躅則斯編又未足以知公也已

谷園續集序

語谿 鍾定 譔

夫人日竭其心思盡其才力出而與天下言詩而詩之道日遠則一端其原莫竟其委僅以詩言詩也蓋言詩必本乎性情言情必本乎忠孝是以奇而法正而葩立言則爲大家之文章立朝則爲大臣之經術隨所之而發之沛然其有餘也茲蓋伏讀茨邨先生之詩而知清風穆如可以驅天下之塵翳而開天



下之源流矣先生本少保公家學之淵源芳規不墜  
架有賜書讀窮萬卷不屑蘭若翡翠之觀而有碧海  
鯨魚之力讀其詩者可以得其梗槩矣不知先生未  
十年而孤壯而益慕二十年而仕尊而益謹孝於而  
家忠於而國平篤摯之性情至於山川游覽賓  
僚贈答之詞亦靡不清真剴切使其人其事其時其  
地皆令人流連而想見之焉非世之浮慕者流好爲  
圖圖籠桶以供其改換飾其寒儉者可望其高深也

故出而爲政所在澄清引經斷獄民自不冤既本乎  
學術之醇正性情之和平而又有少保公忠孝之前  
徽培養人才之至意以爲之佑啓即不才如定者不  
第顧之復之俞匿瑕且時出其鴻詞大文開聾啓  
聵若以爲可誘可迪而不忍或置之者不但已也又  
以谷園續集屬序於末吏念不才吏昔黜學識今困  
簿書蠡測管窺安能序谷園詩哉顧唯先生好學下  
問之意古今絕少而忠孝清白之家風又今時第一



出其詩令天下讀之可以端性情可以厚風俗可以  
明在三之誼可以昭一代之盛附名簡末不啻青雲  
雖固陋僭越其奚敢辭况他日者質威尹陟奕葉象  
賢令狐楚絢瞻乎後矣是集也豈言詩也歟哉

谷園續集序

雲林

王圖寧

譔

明良已始賡歌聲依言永響族聿宗風雅性至情生  
始可言詩想之妙悟惟能逆志得辭表之真詮  
杜聖李仙各開生面黃工陶朴自具心聲蓋山川毓  
神秀之精華而時物觸文人之興緒若夫江流三折  
代有奇才臺置千金人欽國士許開申繼赫然鐘鼎  
名家武緯文經允矣簪纓世胄筆牀陳翡翠參差十



文珊瑚硯匣砌琉璃掩映萬籤碧玉數家珍於寶肆  
光接琳瑯步前武於沙隄文優臺閣於是有懷明發  
則纏綿悱惻不徒風木之思矢志日襄斯忠厚和平  
儼聽簫韶之奏時而怡情花鳥香生字裏如薰荀令  
之鵲鳩或者曰烟嵐畫在詩中奚藉閭郎之丹粉  
讌會而燭鐫梓澤獲秦鹿於毫端憑弔而箋研藤溪  
走董狐於腕下迨夫溯秦淮探禹穴會心處載滿奚  
囊登石嶺憩梁園退食餘傾翻才斗春風桃李簡授

烏絲秋露蒹葭思馳銀管驚人句出直教紙貴洛陽  
倚馬賦成何讓氣吞雲夢傳仙根於奕葉宜多黃絹  
幼婦之辭輯藻帙於等身盡是白雪陽春之句薪因  
積而彌上珠曰而益輝鸞錦焜煌得寸者尤思得  
尺豹文炳蔚窺半者必欲窺全是以初編固希世之  
珍續刻更連城之璧也維茲階凝柔荔嶺放疎梅一  
騎飛塵喜獲捧五雲之檄幾年面壁惜未觀二酉之  
藏乃蒙屬以弁言自揣曷當重命數黃論黑止堪守



免於雲林挾槩懷鉛烏敢塗鴉於雪苑然而旗亭絕  
調已定甲乙於歌喉樂府新詞猶載丙丁之牙軸宮  
商一片雖獨自寫心金玉千篇顧誰非具眼大抵探  
夜珠於海藏別有才思滌皓露於冰甌方符神骨允  
當公諸宇內豈惟懸在國門縱妙處難傳有媿序葩  
之卜氏或言隨不朽尚希附驥之顏賢

谷園續集序

慈谿

姜宸英

譔

今河南提刑按察司茨邨胡公爲少保宛委公令嗣  
胚胎前緒年少稱詩向有以谷園集見示者序者稱  
其飄逸清新似已頃余留京師有使從中州來投詩  
五言三章發緘得谷園續集一卷辱不鄙命爲之序  
而詩以致其殷勤之意按察公自起家郎署歷宦武  
昌歷下十餘年今其續編起自己巳歲南返會稽上



先塚移節河東及遷臬河南之作纔五六年所遊跡較前愈廣且遠更歷事益多所得詩甚富大抵馳騁於少陵之間域視前所爲飄逸清新者一變矣其尤致意者自以少遭孤露僑居薊北又內艱新閱纏綿桑梓之慕懷愴蓼莪之感徃徃連什累紙使人增欷嗚咽不忍竟讀抑非獨如是而已每所聞

朝廷寬大之詔及創行諸盛典輒次第頌述其事疾吏貪墨憫俗澆敝亦時時託諸諷諭此則彷彿於昔

之稷契自許者由其道可以施於爲政則公今日之明慎用刑聲譽焯然外臺亦其所得於詩教者深也昔舜之臣二十二人其與舜載賡歌於朝者唯作士之皋陶一人而已二十二人者無與也蓋溫柔敦厚者詩教也皋陶之作士以之使人皆知乎此則無論三百篇也彼律令格式凡所以殺人生人之具莫不有風雅之道存焉惜乎俗吏不知所以用之而後世能詩之士昧於其本又薄之以不屑爲按察公之於



石園續集  
詩既見諸爲政者如此其入而侍從左右歌咏明  
聖德媲美風雅庶克踵於前人吾又將執此卷以俟  
其後也

谷園續集序

河中 吳震 譔

茨村先生有詩曰谷園集人爭頌已久自先生之赴  
中州也余追送於中條之麓下車珍重以別且曰大  
梁子昔游地吹臺固在尚可一往乎余唯唯卒不果  
繼有事梗陽過晉祠游息懸甕山下碧流澄泓如玉  
斜陽老樹徘徊不忍去祠側水亭新構有濠濮間意  
急登之讀壁上石刻諸詩皆茨邨先生作也然皆谷



谷園集  
園集中所未見者吟諷循環不覺日暮訖不能割去  
其移我情如此甲戌冬先生書來更期作大梁吹臺  
游且曰欲取已已五年以後詩刊之爲谷園續稿屬  
一言以引其端余欣然以解曰晉祠之作其在此中  
矣夫晉祠之詩數首耳即移我情終日不能去然則  
合五年之作又當何如哉然余自別先生後益摧折  
痛割不可道非得盡讀先生五年以後之詩恐不能  
釋其幽憂之疾以平其情而暢其胸也獨是疇昔大

梁之約固在而余筋力日以病憊偷情即重以殷切  
之招豈尚能從之游乎廼再拜使者以復先生曰但  
取五年後所作哀集之倘猶能黽勉以果大梁之游  
也余固將盡讀先生之詩如晉祠者復於吹臺之次  
矣



谷園續集卷一目錄

燕越

胡介祉

茨邨

南發二首

途行雜詠八首

清江浦

淮上留別劉德駕德穀兩表兄

舟泊寶應喜家人至

廣陵喜晤劉德柔表兄次日余即南發賦此言



別并有家書囑寄二首

和徐南沙棟居休夏詩以陸放翁病思無事樂

爲韻五首

蘭谷雜詠十四首

吳門得家書作

吳門客次喜晤葯房

庚午元日舟泊嘉興作

寄懷鄭文谿二首

嘉興雜咏四絕

有攜梅花過舟傍者蒼頭往索一枝貯于膽瓶

庾友屬賦漫成一律

咏山茶花

金陵行爲馬節母王烈婦作

石門鎮口號二首

人日偕庾友西谿泛舟訪梅口占

黃冠



西谿道中即事

晚渡錢塘

將至渡口舟以泥淤不前邨人駕四輪牛車載

余登岸戲成一絕示庾友

泊蕭山縣有懷葯房

抵山陰懷季父却寄

過故居百草園有感三首

展先世墓有感二首

留別顧且庵侍御二首

題朱文盎小像二首

雜感八絕

離別曲二首

仲冬朔日赴任河東拜別先壟兼感年來情事

茨頭山莊留別許實夫張真樸

東白峻伯二首

新樂行



遊晉祠步攜李侍郎曹公原韻十二首

贈周雪客四首

趙曲鎮瞻拜外王父大司農玉孺劉公生祠

抵蒲州任四首

十二月二十六日接兼攝運篆之檄次日即馳

赴路村

解州恭謁 關夫子廟

谷園續集卷一

燕越

胡介祉

英邨

南發二首

祉自戊辰二月遭先慈之變終天悲痛幾不

欲生支離草土之餘蓋一切人事都從棄捐

而吟詠亦云久絕矣己巳正月合祔禮成伏

處杜門愀然遠想先世自王父母以上丘壠

皆遠隔越江祉生三十年託根燕土幼則穉



弱長復宦遊從未得一展松楸致其春露秋  
霜之感寸心踟躕不能自安乃焚燭告八筵  
涓菴南發既又念如存之義繞膝依依第覺  
此日別我慈親爲乖離之始頓忘傾逝之經  
年也徘徊悽愴情見乎辭斷續悲音僅成短  
什當不可復論聲律耳

鄉路今當問泉臺未可從勉爲存視息倍覺隔音容  
淚別荒廬草心懸故國松茫茫分兩地一片白雲封

又

生兒三十載從未遠睽離此去雲山外重泉知不知  
誰題楊柳曲自廢蓼莪詩明發雞鳴起猶驚問寢時

途行雜詠八首

夾岬垂垂楊柳枝淡烟微雨最相宜却憐生向河橋  
路只見行人腸斷時

又

依稀烟火出前邨半圯苔垣帶燒痕已入羣峰最深



處土人說是第三屯

又

草舍孤燈黯不紅  
離情一夜雨聲中  
無眠聽徹嚴城柝  
曉色催人又向東

又

二日向萬山過巒  
壑陰晴變態多  
再去幾程登畫舫  
綠楊堤畔聽漁歌

又

烟氣空濛石逕斜  
蕭條茆屋埽人家  
踈籬傍水饒幽趣  
幾個村姑笑折花

又

夢境模糊覺未真  
空教想像夢中因  
身如栩栩花間蝶  
可是莊生夢裏人

又

古道陰森老樹排  
一天雨過淨風霾  
明朝便入江南界  
莫更羈程早渡淮



又

入夜淫霖灑四郊  
朝來鳥雀噪庭巢  
澆愁正欲沽邨酒  
一個青帘出柳梢

清江浦

淮海分支衍脉長  
江山入望鬱蒼蒼  
地連齊楚稱名鎮  
浦近東南壓勝疆  
一帶河隄通市井  
萬家燈火接帆檣  
那堪回首悲今昔  
憑弔仙人事渺茫

淮上留別劉德駕德穀兩表兄

宦游中表各天涯  
相見驚看鬢已華  
姑姪音容悲漸杳  
舅甥踪跡望徒遐  
昨歸故國翻成客  
今在他鄉却似家  
明日片帆南去急  
秋風重得倚蒹葭

舟泊寶應喜家人至

小泊荒城下  
茫茫客思哀  
烟帆愁裏度  
雲樹望中開  
鄉國人初至  
平安信早來  
天涯須自慰  
應不廢啣杯  
廣陵喜晤劉德柔表兄  
次日余即南發賦此言

別并有家書囑寄二首



德水分飛邗水逢離情恰恰一年中那堪又折河橋  
柳明月相思處處同

又

日來風雨釀輕寒別恨重重強自寬故里恐疑人望  
眼封書煩爾報平安

和徐南沙棟居休夏詩以陸放翁病思無事樂

爲韻五首

棟樹生庭中清光相掩映高人此結廬一切塵氛屏

讀書以自娛忘憂復何病

又

瑟瑟秋風起寒鴻天際悲娟娟秋月白素影牕隙窺  
十幅研銀箋譜出長相思

又

鼓我大雅琴披我秋山圖我友既相聚浮白爭歡呼  
新詩共倡和良會無時無

又



空堦蟋蟀鳴遶砌秋棠醉清談晉人風疎放晉人致  
我懷怡且悅坦然忘世事

又

不掃翠黛眉不挿紅塵脚世情安能拘高風殊落落  
卓哉斯何人對之寧不樂

蘭谷雜詠十四首

桃箋十幅句新裁中有相思却費猜爲覓雙魚傳遞  
去好隨花瓣入天台

又

銀浦迢迢漲綠波西風蕭瑟片帆過一簑烟雨蘆花  
畔誰唱淒清欸乃歌

又

霜鴻嘹唳暮天低邊月朦朧塞草迷遙念深閨人有  
夢也應飛到玉關西

又

文鴛錦帳綵鴛衾紫玉瑩篴碧玉琴一枕遊仙清夢



遠霓裳應奏月中音

又

秋影蕭蕭落井梧  
昏黃庭院月痕鋪  
砧聲未絕蛩聲續  
攪我清宵一夢無

又

蓉江兩岬白蘋香  
柳外蟬聲送夕陽  
渡口女兒爭舉棹  
採蓮歸舫闌滄浪

又

片紅絲綠載陽天  
爲囑東皇著意憐  
九十韶光肯虛擲  
一尊日日向花前

又

纖纖睂月曲如鉤  
怕理殘妝獨倚樓  
誰向暮愁湖上過  
清歌夜泛木蘭舟

又

偏綰春光寄柳條  
輕風拂拂雨瀟瀟  
踏青半醉誰家子  
笑倚壚邊逗阿嬌



又

燕繞梁間兩兩飛  
午眠乍醒力全微  
下簾不許仍飛去  
怕惹閒情到繡幃

又

劍泉沸沸吐霜花  
雲氣冥濛日漸斜  
絕壁插空人跡杳  
群鳥噪落一天霞

又

青荇草滿寒潭蟹  
舍漁燈出遠嵐  
沽得酒歸魚正

熟呼朋爲解夜來酣

又

烟虹牕外有無中  
霽色微開月淡籠  
牧子驅牛歸舍晚  
橫吹短笛咽西風

又

數竿醉竹拂朱闌  
庭院深沉翠影寒  
一陣晚風初過處  
却疑誰個步珊珊

吳門得家書作

不歸集  
三千里外家書至兩字平安看得真想像小窗兒女  
夜挑燈共說未歸人

吳門客次喜晤葯房

忽爾逢君至他鄉倍覺親一尊午夜酒半載未歸人  
已歷波濤險休嗟逆旅貧應知無長物只有句清新

庚午元日舟泊嘉興作

爆竹傳春信人同歲却更還家昨夜夢爲客此時情  
漠漠鄉山渺曠曠海日明篙師喧汭泊說是秀州城



寄懷鄭文谿二首

相別我故人屈指一年矣何時挂片帆吟嘯鴛湖裏

又

君客洛陽城我走山陰道故里不見君相思滿懷抱

嘉興雜咏四絕

浩渺南湖舊蹟留才人千載說風流登臨無限滄桑

感歎乃幾聲烟雨樓

又

不問無事  
楊李城邊落照斜  
笙歌曾此醉夫差  
可憐往事無人問  
惟見空田起暮鴉

又

少伯曾携越豔過  
興亡事業付滄波  
至今一帶澄湖裏  
陰雨長浮五色螺

又

古剎真如駕水傍  
唐朝宰相舊廳堂  
崔嵬絕少幽深處  
只有青青竹過牆

有攜梅花過舟傍者  
蒼頭往索一枝貯于膽瓶  
庾友屬賦漫成一律

鄧尉探梅悵未曾  
匆匆鼓棹客愁增  
訝誰春色偏來寄  
觸我離情自不勝  
燭剪小牕清影瘦  
寒分孤枕夜香凝  
與君今夕遊仙夢  
擬向羅浮嶺上登

咏山茶花

絳雪枝頭染出花  
看來疑是赤城霞  
高名只與青山並  
不許人間品作茶



金陵行爲馬節母王烈婦作

吁嗟乎地秀氣靈良有以節烈一門事足紀四坐請  
勿聲喧闐聽我一一述終始金陵馬氏稱望族結婚  
王家同戚里十五于歸婦道嫺敬事孀姑若慈妣寢  
興定省無缺禮寒暑溫清承甘旨一旦疾疾入膏肓  
藥石罔效成不起哀戚竭盡祭葬誠孝婦之名遍桑  
梓操持中饋儉且勤夜則紡績日針黹那識奇禍罹  
自天二十九稱未亡矣長號願從泉下人哭哭奈何

四孤子含泪勉力事經營藐孤無怙賴有恃無幾歲  
荒兵戈連十室九空盡遷徙大義持身不可移守棺  
危坐不離咫盜至驚看太息去一棺端然獨未毀天  
道茫茫不可期孟仲兩孤運逢否膝前只存叔與季  
悲泣訓迪無倦止孤燈影懸四十年寒機聲響三更  
裏俄看成立邁先人森森玉樹羅階阨中丞彭節達  
九重天子見之顏色喜建坊通衢揚令名醇風感  
化藉芳軌七十七年謝人間乘鸞遨遊碧落水遺徽

未泯逮女孫烈性自天無與比奇異應是再來人讀  
書聰敏明道理幽靜閑雅閭儀脩孝友不愧家聲美  
長適王郎琴瑟和處身接物勝冠履夫婦一載悲參  
辰獨嗟無子承宗祀泣言我與大母同大母應生我  
應死父母驚聞勸且慰嗚咽不進一溢米勉弟立學  
奮頭角揚親期弟弟勿委寂然長逝不復留去夫死  
日八旬耳練衣在身死不易面容憔悴骨如指吁嗟  
乎世道卑靡風俗鄙濟濟者誰列朝市節烈倡令女

子全鬚眉男兒耻不耻採風使者誦我詩好載雙貞  
入青史

石門鎮口號二首

壘石爲門古戰場春秋吳越此分疆潺潺舊日長河  
水只送東西南北航

又

夾岬桑林綠映嵐一年生計在春三人家男婦無他  
事不解畊田解養蠶



人日偕庾友西谿泛舟訪梅口占

勝地勞勞久繫思  
偕朋令節此探奇  
人穿竹徑過欲  
斷鳥語春山聽  
又移谿水只通八  
九里堤梅纔放兩  
三枝一時歸思花  
前發却憶盧郎此  
日詩

黃冠

何處黃冠山裏住  
陰陽日鍊九還丹  
丹成不怕爐中  
忌一任嬰兒姪女看

西谿道中即事

路轉村廻境絕譁  
幾灣流水遠平沙  
入春園圃先鋤  
筍未夏人家競採  
茶一帶遠峰青不  
了四圍深樹綠  
全遮卜居我若谿  
頭住日醉寒梅兩  
岼花

晚渡錢塘

渺渺錢塘渡中流  
縱目觀晚烟昏古  
岼暮色隱平巒  
波靜澄江瀾風清  
落照寒故鄉今咫  
尺回首憶長安  
將至渡口舟以泥  
淤不前邨人駕四  
輪牛車載

余登岼戲成一絕示庾友

名園集  
纔過短壩又長江甫下盤輿上畫艘誰駕牛車來迓  
我紫衣應自大槐邦

泊蕭山縣有懷葯房

夜泊蕭山縣樓頭已二更千家人語寂一線月痕生  
裘敝寒偏重窗虛火不明北平歸去客可過廣陵城  
抵山陰懷季父却寄

十月南來信開函有淚痕細看書內語黯絕旅中魂  
風雨憐遊子寒暄念從孫故鄉翻是客心事與誰論

過故居百草園有感三首

百畝園亭半已蕪蕭條風物景全殊老奴爲說當年  
事辛苦經營血也枯

又

土垣半圯竹籬斜石逕苔封沒草芽獨有老梅猶似  
昔含香仍放舊時花

又

小閣三楹好納涼秋風時送芰荷香如今只剩空塘



水無數青青荇藻長

展先世墓有感二首

燕山留 賜塋越水多祖墓一本誼纏綿南北須兼  
顧社也生宦邸目不識鄉樹悲哉先少保棄我方童  
孺 國恩戀宗周封域勤固護本源思水木春秋感  
霜露豈不念維桑弱翮難飛度稍待骨力强便促皇  
途赴中外紛簡書東西邈天路怒焉在寸心九京安  
可訴茲罹失恃憂禮始成合祔跼伏多暇晷憬然發

深寤倘仍四體逸或恐先靈怒迢迢歷山川渺渺尋  
烟霧得拜墓門深儼若冠裳聚長跼祝明裡涕零如  
雨雨遲來積愆尤哽咽詞難吐一氣通曾元俯鑒惟  
情素馨欬恍聞聲精誠於此遇起視周四隅迴環僅  
千步祭物散烏鳶荆榛竄狐兔但傷無寧居攀栢非  
久住牛羊下日夕徘徊有餘慕

又

吾宗系忠簡卜居來江鄉山陰巖壑勝聚廬亦已康

仍世多隱德累葉才且良本支慶繁衍先澤方綿長  
篤生我王父遺腹罹嚴霜時維曾大母晝哭相攜將  
孤寡勉振拔艱險實脩嘗苦節必有報天道非茫茫  
王父既宦成先子復名揚綸封褒兩世天語何焜煌  
煌幽宮表石碣千載流貞芳餘蔭迨曾孫墓木森已  
蒼再拜緬徽音追述焉能詳更聞王父幼意氣殊激  
昂指點荒墳瑩志欲起周防宗祠建道左萬家容塚  
傍遠圖一以遂泉壤增輝光晚歲樂優游自卜劍履

藏至今青山宅翔集如鳳凰雜草被岡巒五色爛文  
章有孫初展謁仰瞻俯自傷少孤與祖同樹立難比  
方母恩尚未報祖德安敢望但逐浮萍飄忍令蔓草  
荒松栢有深痛豈獨眷梓桑抱此徒區區永矢期毋  
忘

留別顧且庵侍御二首

今日通門更幾人如君相對情性真歸遲自歎家無  
定見晚偏憐意倍親諫議昔誇名御史文章舊識老



名園集  
儒臣山莊容我來栖止日坐春風飲德醇

又

纔喜披襟願又違臨歧分手淚頻揮迢迢故里迷春  
樹脉脉離情黯夕暉嫩草綠依頽岬曲長河青破片  
帆飛他年重過歡應似或傍林泉買釣磯

題朱文盎小像二首

曾吹黃鶴樓頭笛也泛鴛鴦湖上船過眼溪山已難  
得披圖輪爾占雲烟

又

湖堤宛轉壓重橋露葦風蘋拂櫓腰萬頃晴波一聲  
笛月明無際夜迢迢

雜感八絕

長河千折水拖藍却憶佳辰三月三小汎扁舟饒勝  
事誰言春色在江南

又

楊柳青青暮色澄維舟古岬月初升呼童煮蟹開滄

名園集  
酒絮語春宵醉不勝

又

兩度春風十日淹  
溫柔消息夢中恬  
別來可有新詩句  
應爲愁多句嬾拈

又

渺渺關河幾萬重  
鳳城望處白雲封  
誰憐有客天涯  
獨好夢無緣覓舊踪

又

砑羅裙子越羅衫  
丰韻天生迥出凡  
莫訝世人難得  
遇桃花深鎖翠雲巖

又

正值炎天却遠征  
匆匆不盡別離情  
夢回孤枕人何處  
殘月滿窗雞亂鳴

又

魂銷十里短長亭  
一曲驪歌不忍聽  
郎去江南妾薊北  
斷腸風雨泣飄零



又

一樣扁舟綠水前如何消息竟茫然東風只妬花枝  
好吹落殘紅那解憐

離別曲二首

日與長安遠翻憐別恨多爲言堤上柳春色近如何  
又

踪跡渾無定平安寄亦難應知盼歸棹日日倚樓看  
仲冬朔日赴任河東拜別先壟兼感年來情事

奔走江南北親朋各一隅三春留越地半載滯吳都  
夢覺蕉中鹿身慚墓上烏那堪歸未久風雪又征途  
茨頭山莊留別許實夫張真樸

莽莽河橋路風埃竟日昏相看不忍別去後復何論  
醒醉留雙眼心期重一言懸知書信到愁絕故山猿  
東白峻伯二首

奉使西行路逶遲停驂喜得遇親知美君鄉里爲師  
席不用愁題首著詩

又

朔風日日凜長途逆旅村醪興嬾沽爲問廣文謀一  
醉酒錢可有十千無

新樂行

北風栗冽雲迷霞行行客子愁天寒未曉已歷三十  
里停車旅舍纔朝餐幾間茅屋烟一縷塵飛道塞人  
聲謹大馱小馱以百計騎從赫奕乘雕鞍中載金銀  
珠寶玉纍纍宦橐不可殫問從滇南萬里至得意直

欲誇長安因思彼地兵燹後官長詎不憐凋殘若令  
立心盡如此朝貴夕富殊非難余昔兩持齊楚節歸  
來不改舊日觀圖書二笈風雨袖見者莫不生悲酸  
親友嘻笑鄉黨耻骨肉僮僕皆欺瞞始知廉吏不可  
爲若爲廉吏人不歡回首顧客與客語從來天道如  
轉盤不見石崇鬪富賈竒禍又不見仲寶富窟非久  
完所貴傳家秉清白庶幾仕路無驚湍客乃唯唯轉  
相告永佩茲語世不刊



遊晉祠步攜李侍郎曹公原韻十二首

夙昔聞懸壘來遊得故人亭臺霜後皎草樹雪中春  
薄宦羞丹槿扁舟憶紫萸晉陽滄海感一一冷秋廬

又

路轉荒祠啓憑誰問舊封剪桐無往蹟酹酒但遺容  
座暗蛛絲密簷頽鳥跡濃可憐瞻拜罷殘照半山春

又

巖竇雖微異泉源自不殊流分田盡玉灑迴樹爲珠

坐聽心逾靜行吟道未孤宵深涼月裏彷彿在水壺

又

一徑瑤壇上時聞鐵笛歌三庚餘劫火六甲幾兵戈  
玉局朝霞燦璇題夜月多黃梁炊早熟不待夢中過

又

數子真同調名將勝地偏不知前度客誰記此遊年  
境僻堪攜酒時平會止鋌寥寥裙屐興懷舊賦新篇

又

典禮名賢重春秋兩薦繁風流前後映功業簡編存  
嶺上神仙館泉邊鹿女幡由來崇祀地原不在鄉園

又

更入雲暉洞撐空絳闕隣千花寒不落萬乳碧無塵  
吐納隨時變眠餐發興新石床兼藥竈暫憩豁吾真

又

跨澗橋平檻何年鶴往還因知一丘勝多在此亭間  
漁鳥風前浪空青雨後山層層圖畫意好爲倩荆關

又

圖錄唐興地川原晉故城餘風幾更變片碣尚分明  
字有蛟螭護文同日月行至今渠水上猶見瑞雲生

又

金母功何溥馨香歲不窮綃紅林影外環翠水光中  
社鼓三春雨靈旗五夜風居然精爽在感應動深宮

又

坐我千尋栢疑來泰岱登試看奇崛幹彌見雪霜稜



色映雲霄黛香凝佛殿燈延年膏可乞終擬傍谿藤

又

藉甚周郎筆雄哉子建才詩篇留照耀形勝逼蓬萊  
約擬三山踐圖思五嶽開何時機事息杖履此頻來

贈周雪客四首

梁園公子近如何往昔風華半已磨回首軟紅塵十  
丈輪君冷幕引恬多

又

三十年前舊酒人清狂如爾世無倫黃金散盡那知  
惜買得江南處處春

又

萬卷縹緗小印藏傳鈔一一手親裝自從家破書都  
失辛苦誰人念侍郎

又

去年我亦到秦淮不共君游事事乖桃葉渡頭迴憶  
處孤舟明月繫人懷

趙曲鎮瞻拜外王父大司農王孺劉公生祠

緬觀明季世璠禍亦何酷衆正盡一網連年興詔獄  
緹騎走四方銀鐙道相屬國體傷已甚縉紳死桎梏  
死亦君子常士也寧可辱宵小乃無知蒙面甘趨趨  
兒孫遍公卿生祠起大督九州若鼎沸攘攘趨時局  
疾風知勁草不屈惟公獨方其立朝時羅致亦已數  
固卻至再三彪怒久所觸及來守平陽清操更邁俗  
當門必見鋤逮繫將逞毒生死良在天行部登車促

駕帖來少遲展轉俟開讀寮吏共號呼萬民請身贖  
豈遂回燎原聊以淹信宿旬日公始歸天地有反覆  
新君一當陽僞旨收迅速奸黨次第誅公忠遂見錄  
此事六十年千秋傳信足至今思甘棠畏壘留趙曲  
社也外孫行遺教忝沐浴褰帷適此邦前修慰瞻矚  
道傍下馬拜薦馨爇明燭慈德邇淵源劬勞思鞠育  
迎養悲長辭音容慘心目密邇幸大寧循良方並勗  
公子余叔舅家聲守如玉懷哉勿敢忘矢願爲公告



抵蒲州任四首

川嶽爭雄地從推漢股肱開藩封最重持節 命初  
承河勢迴黃曲山形積翠層採風應攬勝蒲坂已先  
登

又

日視長安近星從參野占未遑寧傳舍亟爲問閭閻  
虞夏仍留儉夷齊可作廉中條青在眼聽事不垂簾

又

用武雖雄國敷文自 聖朝凋疲方漸起戰伐已全  
消敢謂風能易多知俗不澆河汾饒禮樂闢館莫辭  
招

又

官守期無忝 君恩敢刻忘苦廬纔釋服茅土復分  
疆宦跡連齊楚循聲媿漢唐惟持此心在一任笑空  
囊

十二月二十六日接兼攝運篆之檄次日即馳

赴路村

已封節假連旬篆忽接臺頒動地符過聽兼人能擘  
畫敢言逼歲憚馳驅星飛驛路程長短雪滿鰲池瑞  
有無自笑代庖堪幾日且調羹味佐屠蘇

解州恭謁 關夫子廟

平生域內深仰止山東山西兩夫子聖賢豪傑雖殊  
科一致同歸良足比事主能全忠義心讀書況得春  
秋旨兩間正氣扶綱常萬載高風激頽靡莫將成敗

論英雄當以興衰徵信史炎統垂絕乃天意中原既  
失乖地理功名百戰徒巍巍事業三分聊爾爾談何  
容易復神州歷盡艱難存漢祀誓滅孫曹願未終威  
行華夏圖方始誰知一跌在須臾身與荊州同逝水  
不臧夫豈盡人謀他日街亭亦如此老臣無復瑜並  
生大將何緣飛亦死此中得失非偶然事變由來可  
知矣千秋尚論惟空編今日親承從故里寢興肝鬢  
神憑依廟貌傳聞形儼似帷中袍帶颯以飄門外旗



竿危欲起橫刀躍馬時去來侍從常看汗流趾然疑  
不復須計較夫子威靈寧在是世傳靈迹殊已多身  
後編年堪作紀摩訶碑記遍蒼苔叅天松栢風盈耳

谷園續集卷二目錄

燕越  
胡介祉  
茨邨

路村行

喜晤劉宣人叔舅二首

河東雜詠八首

較士

王聘三招遊王官谷以事不果悵然有作

哭劉葯房表兄四首



谷園續集卷二

路村行

燕越

胡介祉

茨邨

河東轉運專城居鹽池權利供儲胥安邑以西路村  
地萬家之聚商民廬城周十里門四關形勢想像經  
營初星當觴觴定分野域紀條涑徵堪輿自古相傳  
郇伯國於今實賴姚暹渠由來池水畏傍雜橫堤直  
堰羣流緒不使淡薄涓本性若苗有莠常芟除幾見

望華四首

恭捧 覃恩誥命悲內子不及見感賦二首

過司馬溫公故里

飛蝗行

遊禹門次河津令楊輯菴韻四首

喜張治安至

讀司馬溫公全集題後

聞 特簡豫臬之 命志媿二首

留別蒲州牧謝齊政

渡黃河

曉過潼關

陝州道中值雪二首

至洛陽喜晤汪悔齋太守

閱使琉球雜錄因題長歌

抵開封是日大雪二首

王裕三就婚來汴賦賀三首



輓鄭文谿十絕

汪悔齋以河南郡守 特擢福建臬使賦此言

別二首

先慈忌日三首

過商丘擬訪西陂諸勝未果有懷宋牧仲中丞

遙和雜咏却寄六首

嵩嶽四首

秋日偕張庾友吳湛長游少林寺四首

重修外王父劉公登封縣生祠二首

癸酉中秋大梁瓊院同李朗菴方伯陪顧伊在

大中丞翫月小飲用先少保武昌關中望月

韻三首

秋闈紀事二首

曲阜 聖廟落成

上遣 皇子致祭恭紀盛典十六韻

形成果如虎倘令味變還生魚繞池禁垣誰所築萬  
七千丈猶贏餘較之運城儼十倍屹然南北高相如  
衛池即所以衛課前人區畫寧迂踈天時尚復愁旱  
澇溢或泛濫乾沮淤牢盆那得似淮海安能煎掃同  
青徐恤商裕課轉運職祈風禱雨行趨趨利之所在  
弊叢伏商民疾苦勞爬梳繡衣使者歲一換瓜期轉  
盼迴軒車呼吸縱可通 帝座席不暇煖多踟躕跨  
連三省幅幘廣況難一一知盈虛畫土分疆朝暮改

行私食淡相侵漁職專任久惟轉運位卑不許封章  
臚簿書期會幸無過賢者亦或徒欷歔我來越俎更  
局趣五日京兆聊居諸必欲周知在民隱須教足迹  
窮村墟堯山禹城目流覽虞歌晉問胸縈紆縱有所  
見豈親切眼中安障何時祛更看俗頗異唐魏爭誇  
末富聯纓裾繁華作使商賈習農民徃徃無朝儲晉  
人謀遷利饒沃魏絳一語良然歟近寶乃貧勢必至  
國中誰肯扶犁鋤吁嗟乎路村之利不可恃太息誰



上司農書

喜晤劉宣人叔舅二首

別未三秋殊覺久途經千里亦嫌長來遊較遠如安  
德失恃彌深念渭陽詩草滿囊傾與讀燈花照酒喜  
堪狂明朝共訪談遷迹太史聲名一路光

又

兩家宦路迹多同中外雲霄祖父風只有登瀛難似  
舅此來卧閣尚思翁外王父曾守平陽司空列栢齊州見伯舅

增美公前撫山左

大令栽花晉水通

叔舅大年公今令大寧

及到祠堂

瞻俎豆流連先澤更從公

河東雜咏八首有序

余所到輒考圖志爲即景詩非沿俗也良以  
山川風物往往經昔賢品題而後出後之載  
筆者採覽而編次之或因地以傳其人或因  
人以傳其地非是無以存古蹟啓來茲是或  
一道也夫河東跨連秦晉表裏山河堯舜禹

三聖人之故都在焉其間帝王卿相神靈英  
傑可歌可詠之事多矣而或傳或不傳採風  
者之足迹有至有不至惟約之以八景庶得  
其勝槩之大凡云暇日各係以詩載之小集  
以此當目前之卧遊也可即以此志他日之  
去思也可又何必矜情矯習鄙棄衆觀以爲  
舉無足道也哉第不欲勦襲雷同以七言八  
句隨聲逐影而稍稍自別其面目則未免有

好異之見存若夫憑弔古今隨時興感以及  
名區勝蹟或遺於八景之外者分題各出正  
不在此限耳

禹門噴雪

兩山忽開天一水驚動地中分翠屏削四散雪花墜  
跳珠浪層曳練光綴綴搖心激危湍撲面生涼吹  
緬此河流雄懷哉禹蹟異後世守平成前功較難易  
徘徊川上祠登眺雲中寺隔遠尚聞聲橫空難逼視



竹箭流無停桃花春且至淇園薪若爲爲問宣房使

砥柱轟雷

禹功何太奇似欲撐地軸三門連壁開一柱中流轟  
雷霆怒而闕水石勢相感驚呼人不聞旋轉鳥爭速  
萬馬奔平原孤軍戰鉅鹿其色變風雲其聲振林谷  
自從懷襄來力抗惟此獨特立比君子不隨波碌碌  
平生所敬愛常願留心目何日攜畫師正襟寫直幅

霍嶽堆青

作鎮祠至今稱嶽名自古遙從太行來歷歷峰可數  
觀埴色尤奇翠黛列眉嫵淺深隨點筆大小分劈斧  
地產珠玉英天授丹青譜望華若可攀配衡儼相輔  
神木不棲禽幽庭常守虎寺僻問休糧泉靈徵打鼓  
日出先上方雲生時一縷山容但熙怡早知天下雨  
條峰拖紫

中條踞河曲遠望勢綿亘向背各陰晴嵐光殊不定  
獨以拖紫名得無誇捷徑過客雖留題山靈宜却贈

不圖集  
隔河見潼關征途朝復暝或謂嶺雲稠疑與車塵疑  
我知巖壑深別擅幽奇勝半頂出琳宮懸崖垂石磴  
行歌忽起樵宴坐惟聞磬落日抱峰腰圖經差可證

虞臺解慍

晉地不愛寶豁達開鹽池潤下自然作滲漉周四時  
最宜夏日烈特借薰風吹所獲旨且多爭傳虞帝遺  
解慍復阜財惟帝留歌辭億載如其朔歸美夫何疑  
面池起高臺左右羅神祠祈報在典禮風雨各有司

池北湧淡泉非此鹽不滋大哉造化功一啜生涼颺

漢祀歌風

漢武去已久秋風歲歲來橫汾留一曲歌者至今哀  
盛事繼唐宋游觀集群才碑版如積薪已復生莓苔  
少壯能幾時繁華安在哉當年擁簫鼓何地非樓臺  
時代迭興廢但見祠宮開松柏歲寒姿風雨還摧頽  
山川徒似昔憑弔空徘徊感此日行樂莫負尊前杯

姑山霞洞



世間藐姑射輒作神人想快讀逍遙遊彷彿交精爽  
冰雪慕肌膚綽約難形象那知蒙莊叟寓言多惆恍  
茲山名旣著秀色寰區仰天然結巖洞栖真疑秘享  
佳氣日氤氲烟霞得真賞此中若有人呼之應如響  
生腋仙風輕投懷明月朗蓮花何處通竹杖吾其往

平水瓊瀾

方源曾孕玉不媿瓊瑤名月波欲稍上風瀾時細生  
微微赴灘急漸漸歸湖平游人選勝地士女來傾城

路青還被襖上已連清明空中畫楫動鏡裏紅妝行  
六月却炎暑三秋涵泓峰雪驚一雙影霜鴻三兩聲  
此時天地曠豈獨形神清要做寒江圖釣艇當中橫  
較士

河汾禮樂風何似使者褰帷許借觀別有神明通象  
表細將得失辨毫端身登蒲坂誇親到寶近郇瑕正  
耐看時通檄所屬彙送試卷  
運學蒲州則皆親較燈下預操千佛政選場  
休待燭光殘

王聘三招遊王官谷以事不果悵然有作

志士負耿介達人希恬和各懷遺俗想逸尚尋槃阿  
表聖有殊操二柄同一科早退示從容晚節成巍峩  
觀其咏耐辱柳下相肩摩及乎却梁聘首陽夫豈過  
不仕亦已矣嘔血死則那乃知夷惠間所得良較多  
當年栖隱地清絕臨關河中條山截業王官谷逶迤  
亭觀幾卜築畫壁應不磨文節兩見收結習耽吟哦  
依然承平風嘯傲歷兵戈盜賊且不犯而况世網羅

斯人邈天雲豈惟挽積波欲訪平生居勝迹親摩娑  
盤石想坐卧澗泉聆高歌此願發已久塵俗紛延俄  
忽來折簡招起舞方傴僂屏當簿書畢銛戒停騶呵  
一往興頗豪孰意仍蹉跎束帶殊悶人鬱若增煩疴  
微爲居士笑我心勞如何天柱峰入雲瀑布流滂沱  
樵斧響空山牧犢驅前坡游人杳無迹谷口垂烟蘿  
哭劉葯房表兄四首

未竟生前事難忘死後情一官家轉破百口累非輕



旅食艱妻子離愁急弟兄故園終不返收骨傍先塋

又

我母憐佳壻吾兄痛老姑音容常共憶骨肉本無殊  
天上魂今聚人間影獨孤一樽遙奠處雙燭淚模糊

又

正遣迎車往翻驚計問傳歸歟方有日逝矣竟無年  
久客心神竭瀕行疾病纏清江多少路生死隔天邊

又

小角早相得周旋筆硯隨有時同賭酒無夜不爭詩  
遺草多酬唱重泉永別離人琴悲豈但絃絕爲鍾期

望華四首

惟嶽華最奇遙望如植立厥高五千仞際天若可及  
削成分四面無一肯相襲蓮花舒萼跼玉女露裙褶  
中間落鴈峰帝座通呼吸不知所究竟但見勢岌岌  
鳥道絕攀援人力窮階級我欲遂幽尋車箱何處入

又

名園集  
昔聞有狂客風流李謫仙欲攜驚人句搔首問青天  
怪哉昌黎翁身世何難捐既上不能下痛哭殊可憐  
投書別家人其語惜不傳近知所到處猶自非崖顛  
勇怯故不齊濟勝恒多偏况或被形役世網常拘牽  
伊余策蹇步志在探雲烟守官各有土秦晉空連綿  
推窗看首陽對峙遙峰蓮秀出供八案終歲相周旋  
登臨既無分夢游亦少緣徒令飽吾目如食不下咽  
脫復捨之去何以追前賢

又

日日望山頭不知山上境丹青一指點披圖每尋省  
何所是瑤臺幾層方玉井仙人掌最高日月凌倒景  
瀑布掛飛流匹練垂虹影只恐洗頭盆天風吹髮冷  
金精石髓多飽食消晝永高卧同希夷一覺千年整  
鳥獸莫能居得無嫌太靜此中有真意目擊心已領

又

朝看山色吐暮看山色含朝朝與暮暮看山勤且貪



翻笑登山人日力窮幽探足迹未及遍跋涉難自堪  
身况在山中有如書內蟬食盡萬千字不知經幾函  
有筆皆能題有口皆能談試問古今來作者誰無慚  
何如坐幽窗惛眩日再三不計地所歷但見天遙參  
其傍更四周一一恣盤酣兒孫有少華弟畜惟終南  
此秘乃獨得固陋亦已甘竟擲手中杖非因頭上簪  
恭捧 覃恩誥命悲內子不及見感賦二首  
歷仕慙無補宜家賴有終如何鸞誥接不與翟衣同

殿陛臣心切泉臺 帝命通幽靈還髣髴拜舞一庭  
中

又

相國稱嬌女夫人授母儀貴游能不染薄宦喜相隨  
一命時難待三生事可知 綸音悲且感有淚亦如  
絲

過司馬溫公故里

涑水千秋里祠宮何處開漫勞行客問想見相公來

元祐中興業熙寧作史才生兼三不朽遺迹豈蒿萊  
飛蝗行

彼蝗之來何所從蔽天匝地愁三農自燕及晉到蒲  
坂天意欲使河東凶吾聞堯水湯旱古常有人事消  
弭亦非偶但令精意能感通會見神靈効奔走方今  
天子敷至仁豐年大有宜屢臻四時祈報况無闕若  
不舉職非明神一方災沴誰所致乖錯得無緣吏治  
九重宵旰尚憂勤臣子何心安坐視分疆列土各有

司率民捕蝗勞莫辭還恐人力渺難及八蜡步禱先  
農祠首奉天威宣帝澤中言神職應無斁未復  
纏綿致一詞引咎俯躬惟自責至誠敢信天可回聊  
乞神惠紓民灾歸路桑陰騎馬遠連郊麥秀迎人開  
村氓藉藉驚相語盡道飛蝗渡河去感格分明伏  
帝靈驅除迅速邀神助繞蒲四境何青青蝗來便去  
無留停田中不損一岐穗界外乃無三寸莖我欲重  
來告冥漠此心忍使隣爲壑莫非王土望同仁不願



蒲民甘獨樂神之力兮寧有窮爲民請命于蒼穹盡  
殺蝗蝻不留種十日一雨五日風四海九州同一熟  
百千萬歲周還復紀事碑成更作詩非敢貪功但祈  
福

遊禹門次河津令楊輯菴韻四首

十年夢想禹門過比及西來肯負何不歷此山開鑿  
險焉知終古奠安多崖盤鳥道雲爲棧巖傍蛟宮霧  
作阿欲並馬遷論史業涕零彩筆渺烟波

又

一峽雙峰夾混茫振衣極目上層岡千尋峭壁連天  
翠萬疊驚濤接塞黃尚憶經營從積石遂令區域限  
扶桑酒酣便泛枯槎去直欲身隨碧漢翔

又

嵬峩宮殿擁霞標雲罕星旗影動搖松柏晝縈羣馭  
舞風雷晨起百靈朝闢成地軸包滄海奪得天關絡  
絳霄巍我澄清無術致告虔一爲駐征軺

又

神工一一石龕留撥蘚看題感舊游星夾井參虛閣  
杪山分秦晉大河秋安瀾喜得循良宰探宿曾傳博  
望侯竚待桃花春浪起多君佳句舄邊收

喜張治安至

登臨憶共故人杯懷抱經年未得開忽喜張星天上  
至遙看舊雨日邊來青分嶽色堪供眼黃似河流笑  
潑醅斟酌倍償離思積傾樽擬醉一千回



讀司馬溫公全集題後

新法亂天下宋社幾欲仆時維司馬公奮呼出手救  
羣賢悉倚仗衆志堅朝右面折復封章聲若鯨鐘吼  
得眷雖益深去疾不能驟功利中帝心兩耳充如褭  
人望徒見留兵事置樞副公曰言不行碌碌肯輕就  
決去示力爭優游卧巖岫居洛十五年時政日紛糅  
絕口縱不談晏坐雙睂皺應詔六事陳感疾遺書構  
慷慨累千言一語必三復異用積忠誠開悟託身後

豈知竟及身頃刻變昏晝汲汲拯民生茫茫扶宇宙  
一代致中興太平欣再覲鞠躬力已殫瞑目心何疚  
德與天地長功存社稷懋言立在平生斯文千載壽  
我讀集中編理學真窮究所本惟一誠華實自兼茂  
小者或篇章大者乃劄奏言言關盛衰一一徵休咎  
建儲端國本議禮息群咻卓哉睂山蘇狀公無罣漏  
稱公文適用一言發其覆如穀帛藥石又如金玉售  
價重比連城明堂宜急購堪笑世俗卑習見安固陋

唐宋僅八家荆舒亦俎豆但取文章豪不顧學術謬  
讀書貴知人是非焉可替同時公位置歐陽韓范富  
後先爭挺出道合無殊臭睂山輩晚進推公爲領袖  
巍然首黨碑天上冠列宿諸呂行同敦二程道亦扣  
已升游夏堂豈涉馬班園獨是史家體諸葛書入冠  
人言祖仲達正統尊所授紫陽有異同後世滋疑竇  
要亦人情恒何足相病詎此集藏名山不脛而善走  
歷年已四百有識重刻鏤曰余外王父河東方作守



衡文使者來盛事成輻輳較讐辨焉烏完好差勝舊  
弁言紀歲月驚看屬丁戊吁嗟崇禎初彷彿如元祐  
寓意良已微開編儼列穀寄語篝燈人毋徒尋句讀  
聞 特簡豫臬之 命志媿二首  
十年三忝維屏寄此日重蒙不次 恩啓事末行名  
未列祥刑首路 旨親掄纂帷嵩嶽惟中土移節潼  
關只一門却媿採風纔欲遍匆匆襍被又乘軒

又

人命懸綵判訟庭敢言毫髮見情形 皇仁浩大方  
開網儒術迂踈但引經莫遣微雲生點點從教細草  
出青青此身已在天門側角亢光中認法星

留別蒲州牧謝齊政

藉甚君分竹飄然我汎槎專城知有託夾路莫教遮  
報政期遷樹離心忍見花一河仍共對休道隔天涯

渡黃河

九州以內天地交黃河一水中混淆幾見生靈化魚

鼉有時光怪藏螭蛟自從禹功遍橈櫓更令漢代窮  
薪芟乘槎之游那得上登木而避無安巢 聖世懷  
柔及河嶽河伯受命馳雲旂往來指揮聽約束深不  
汎濫淺不膠我持使節守茲土澄清一路山河包恬  
波四境藉神力報祀有典陳牲醴 天子命我量移  
去跨河間渡尋梁郊解維四顧宛在水開帆風便催  
鳴鐃此中深險大難測濟川舟楫何紛呶直行正駛  
忽逢溜打招側舵歌船梢轉風逆流勢不定撒篙下

席時拋貓明明一葦可徑渡漲灘忽隔如函嶠沙淤  
路折幾十里兩岬猶指窮簷茅欲至不至近若遠往  
往更直風怒哮世間變幻每如此起滅但看浮漚泡  
平生忠信可自許何須利涉占卦爻履險安然神色  
定四海不異周堂坳已知百歲同汎梗令我一官猶  
繫匏

曉過潼關

車麟麟馬斑斑侵星曉發過潼關潼關之上高插天



潼關之下臨河山東西南北路四達一關遙閉雲霄  
間我從河東赴河南繞關竟過如等閒曠曠日出關  
乍啓身不入關無阻艱往來行旅誰得似行遲住早  
多愁顏關門之限固如此出入豈得踈防閑獨惜雄  
關天下最游屐未許窮登攀關中形勝不到眼車輪  
在腹常廻環况復此關昔曾經戰伐哥舒一敗不復  
還杜陵有詩述哀痛百萬人血河流殷沙塲已久不  
知處霜花露草空爛熳國殤我欲寄憑弔更持寸管

誅奸頑車馳馬驟倏已過朝烟遠望生塵寰關勢經  
心頗歷歷河聲入耳猶潺潺幸際昌時方在德和  
洽諸夏通八蠻額稅已將關吏罷腰弓不見行人彎  
但須執禁稍加意啓閉何必嚴雙鑲

陝州道中值雪二首

莫以飛霜並惟將甘雨借應時爭道好入境便知佳  
繡集衣邊出花迎仗裏排翻嫌飄翠幘不比踏青鞵

又

早慰三農望多知一歲占山埋雞足淺關落雁翎纖  
氣可消冤盡光能作瑞添舊游回首憶好擬解池鹽

至洛陽喜晤汪悔齋太守

洛陽天下中汪君海內望人地兩相得投外何須悵  
君抱宏博才高步登蓬閭奉使之海邦 皇威藉遐  
暢秩已青宮遷用待黃扉嚮試守出親民循良徵治  
狀漢庭有故事促裝行入相君略不計較盡職惟保  
障頭帶一條冰依然清暑況詞翰日飛揚文史仍跌

宕我自別君來久矣希高唱蒼茫隔雲樹稠疊分川  
嶂忽驚宦迹合頓覺神情王看花雖非時酌酒笑相  
向此行利得君左右悉倚仗一事積習懷夙願更堪  
償開君筆陣圖潑墨光演漾奇絕快平生使我雙眸  
放

閱使琉球雜錄因題長歌

汪君昔年使琉球歸來異書手親纂就中雜錄最瑰  
奇條分縷析何款款首言使事異他國萬里乘風竟



往返中路更無止宿地所仗一舟託安穩使臣年命  
必相符擇日周詳方定艤今來奉 詔敢留停樓船  
只就軍營選但取鹽枕浸不柔自購藤兜勒無損祭  
神伐鼓揚帆行恃有 天威臨近遠此意已足見忠  
信鯨浪鯨波那在眼次及疆域臚山川極目大洋勢  
平衍一針歷歷向海東七島明明通日本梅花有所  
路已迷木梯爲更說可準姑米遙連那霸雄礮臺空  
設圍牆短惟憑地險是山嶠更倚沙形如錢版渾堅

只有國王城鉅麗便推天使館守禮坊通歡會門殿  
廷一帶兼宮壺樓開殿上俯廷中妃子滿樓簾畫捲  
上頭赫奕供 御書中山世土黃金匾下設王位懸  
聖像絹色蒼蒼墨光黠清闕不許群臣窺天使何妨  
歷深淺較多爽氣宴北宮了無塵翳游東苑到處邀  
題榜字新乞書不用高麗繭望海巖邊海色開聽濤  
屋外濤聲展宮前松嶺錯成行宮後竹牆齊若剪土  
山石磴就陂陀蕉綠榕陰隨町疃靈嶽如拳高並城

瑞泉一勺平浮琰波羅檀洞悉承訛重曼大崎皆襲  
舛乃知昔人多妄作憑君信筆徵其誕俗尚亦與傳  
聞殊雅不知兵頗柔輒怪石誤認髑髏聚強弩漫誇  
身手挽昔曾深信辦戈天今尚恪遵乾竺典三大佛  
寺雄舊觀一聖人祠煥新建奕棋賦詩聊雍容韞草  
踏綿仍苟簡男女可笑無中衣賓主胡爲不共梳女  
手外餘何取黥男髮中空安用辦赤足橫騎馬上驕  
洗頭露坐籬間晚紫巾官貴家漸豪翠幙春深門半

掩重陽競渡作端陽木管當筵催鐵管酒中十指戰  
雄酣月下三絃歌宛轉莫教錯聽兵聲謹誰與輕傳  
邊調慘况當 聖主勅新頒定使藩邦戈久偃海濱  
畔鑿安其常瑣屑還爲羅物產稻秧幾熟兼冬春薯  
葉蔓生無水旱織蕉作布詎堪衣解蕤爲瓜差可辨  
螺惟取肉任簠踈馬不勝鞍停貢獻佳蘇魚味食之  
甘鬪鏤樹名知者鮮米肌女口嚼始成吉果王宮製  
亦罕清泉日送表虔恭醇酒親嘗見誠懇化孚域外



猶未奇響應空中真足感末紀神異至終篇 天子  
威靈豈不顯雙魚擁棹波浮浮百鳥迎檣風滿滿去  
時神力與安瀾歸路天心試艱險颶母起舞海水飛  
日月無光蟠際混擲船作梭刻不停攢鐵成桅半已  
散衆呼天妃或拏公君但焚香詞色緩從容鎮定誰  
則能至今讀之猶破胆布帆無恙早還 朝復 命  
連章屢稱善更給筆札撰此書書成乙夜資觀覽海  
不揚波萬萬春重譯爭來難紀算廷臣應少似君才

他日承 恩更誰遣

抵開封是日大雪二首

報道梁園近前驅路不分萬家皆瑞色千里是同雲  
繞署烏難辨隨裝雀作群我思詞賦客人吏漫紛紛

又

豐是明年事寒難此日祛最憐東郭履忍聽北風車  
臣節懷冰久天心取雪初夜牕勤映牘丹筆爲踟躕

王裕三就婚來汴賦賀三首

爭看騎從有輝光天上人來銀漢傍  
鳳管新調作蕭史烏衣舊識是王郎  
畫眉正用含絳筆坦腹偏連疊  
笏牀身在雲霄生羽翼造舟不俟渡河梁

又

自是人間盛事稀戟門閥閱對綸扉  
郎君身入神仙窟開府家成錦繡圍  
孔雀一屏誇獨中鳳凰五色羨  
雙飛夜來歌舞纏頭費可給繁臺萬戶衣

又

鴛鴦社裏最知名占盡風流是有情  
三五星多終避月一枝花闕補栽瓊  
從來玉藕絲難斷不比金徽手  
易生自笑舊絃成別調催妝猶爲汎新聲

輓鄭文谿十絕

谷口高人鄭子真十年同我溷風塵  
有田不得歸畊去腸斷天涯永訣身

又

楚水齊山與晉祠比來梁苑又經時  
紀遊到處偕君



名園集  
賦不忍重看數卷詩

又

酒杯大是消愁物每共青燈坐夜分後日相思常罷  
飲祇留醉里奠孤墳

又

平生宦路耻悠悠所見多同爲我謀良友遽看三益  
喪食時前箸已俱收

又

迂踈垂橐日蕭條隨分相爲作簡料已有田廬終隱  
計鴛鴦湖上旅魂招

又

酒場歌地見情深每到纏綿識此心臨別黯然常累  
日今朝泉路若爲禁

又

德水浮踪共久稽年年行役汎河堤最多風雨雞鳴  
迹從此扁舟路盡迷

又

我曾南下尋烟雨君却東游滯洛陽餘恨此生償不  
及雙攜月影負書堂

又

竹垞三徑與君連每約生同死倍憐收恤最先惟一  
事傳人詩句定遺編

又

棺衾草草多慚愧人世茫茫足嘆嗟身後敢辭朋友

責孤兒寡婦未成家

汪悔齋以河南郡守特擢福建臬使賦此言

別二首

平生性迂愚落落寡同調不才膺重寄觀察忝清要  
顧名每自思秉鑑當悉照流品詎可淆所關賢不肖  
時論或難諧我心故如燎許可乃無多一二實英妙  
黜陟佐大典敢任虛名釣風馳驛騎來喧傳又一詔  
海邦初救寧明刑資弼教有臣類相如諭蜀經絕徼



近作河南尹治行比杜召文學兼政事綏懷宜閭嶠  
特簡自宸衷廷推孰意料乃知日月明不廢微光  
燭

又

人心猶卧轍王事難停輪悠悠思後會杳杳即前  
津祖餞慰別離一言中座陳我令爲同官舊政比告  
新此行想丰采八閩瞻星辰出入繫民命吏治勤採  
詢霜肅或如秋風和乃若春觸邪獬豸怒不殺麒麟

仁守土任非細疇昔念身親激勸莫遺力似君廉幾  
人君曾持使節省會駐浹繁費減度支供億寬齊  
民至今尚感泣先聲被無垠期君終此惠雖遠欣有  
隣

先慈忌日三首

痛自終天抱悲難此日勝一如桐故削五見穀新升  
封域乖千里雲霄隔幾層起居同八座靈爽竟何憑

又

春露偏多感浮雲况遠遊支牀活和嶠罷社哭王修  
載主神應祔板輿事已休齋居想當日內寢尚彌留

又

坐似生前設身如夢裏存傷心昨日事遺命此時言  
佐餽仍無婦添丁幸有孫風吹燭明滅并作淚雙痕  
過商丘擬訪西陂諸勝未果有懷宋牧仲中丞

遙和雜咏却寄六首

村舍無四隣流水當門淥隔浦鳴魚根烟波飛屬玉

漠漠渚田多鏡湖分一曲

淥波村

又

柳陰戲鱗鬣閒倚釣竿看風開忽見影尾觸浪花散

儂家前後灣別去尋深岨

釣家

又

蟋蟀鳴秋堂漸覺霜風冷緯蕭護簷楹酒坐堪夜永  
此時客許來我便呼舴艋

緯蕭草堂

又



蒼髯紛戛摩松花滿空落一片濤聲來驚起巢枝鶴  
那可無高吟風中相間作

和松菴

又

勝花疑作婢翠帶隨風飄一碧遠無際宛轉通平橋  
荷衣不輕許芰梁誰見招

芰梁

又

主人物外意放鴨林亭幽水禽性久狎相對看沉浮  
恠底濟川楫不驚沙上鷗

放鴨亭

嵩嶽四首

平生遊宦地山水無不有千秋黃鶴樓晴川曾對酒  
最勝惟岱宗三登頗自負晉祠亦名區碑版都在口  
爲吏幸不俗所得良已厚嵩山五嶽中仰止猶恐後  
二載始一來吁嗟緣職守仰面謝山靈迴頭顧組綬  
得到誠汝功遲遲又誰咎功咎無定端斯理焉能剖

又

山名分二室一嶽同所尊東西各異勢區別辭徒繁

左轉黃蓋峰肅穆神祠存漢唐留御路迺迤如平原  
登頓多坦途列嶂連雲屯不覺身漸高猶謂非孤騫  
及登中峰頂始知天可捫羣山絕雁行俯視皆兒孫  
黃河真若帶髮辨清洛痕峻極此不媿勝槩何必論  
造化乃示朴元氣惟渾淪得地誰能齊宅中在乾坤

又

我昔披圖經中嶽久所羨斯遊豈尋常登臨忘足倦  
荒唐啓母石頽廢嵩陽院秦槐與漢栢一覽輒已徧

盧巖稍清出水石供游衍丘壑雖幽深探竒心未厭  
掉頭徑西行忽覩芙蓉面九朵競削成參差眼中見  
秀色仰虛空可餐頻欲嚙六六數峰頭一一來天半  
乃知少室名別以三花擅

又

古人不可作碑碣沉烟蕪搜剔苔蘚字影響多模糊  
遠者乃及漢近則唐宋俱題名竟漫滅歎惜韓歐蘇  
武后何足云侍從群然趨刻石臚姓氏擣辭一何諛



嵩嶽如有靈寧肯爲其污撥棄不擬道所際今黃虞  
此來祝 聖人髣髴聞山呼作頌雖非才光氣無時  
無

秋日偕張庾友吳湛長游少林寺四首

初祖傳衣地開山帝釋家峰形剛五乳樹色抵三花  
少室當窗逼天門覓徑賒所留惟隻履萬具禮袈裟

又

面壁原無相翻經賸有臺渡蘆身亦幻立雪首初回

一片石誰影五宗花自開覓心安已竟何必問西來  
又

代有神奇跡傳聞自昔年法中原偶爾教外豈徒然  
叱石迴流水舉旗得賜田至今誇獨絕一棒欲彌天  
又

祖庭天下仰碑記古今多斷碣人猶撫懸崖字不磨  
大名驚自出薄宦喜重過難繼尚書跡題詩映壁蘿  
寺壁有先外王父大司  
農劉公令登封時詩刻



重修外王父劉公登封縣生祠二首

外祖風流欲嗣難  
偏同宦跡幾回看  
晉原廟貌栖神妥  
嵩嶽碑形墮淚殘  
作令已堪覘大略  
如公尚復起微官  
每因持節經過地  
俯仰慚多一駐鞍

又

年年會鼓復傳芭  
歌舞刑牲俗未賒  
蔽芾尚看留一樹  
栖遲更喜得三花  
摧積風雨終難朽  
固護烟雲欲倍加  
丹雘敢言成宅相  
肯堂諸舅在天涯

癸酉中秋大梁瑣院同李朗菴方伯陪顧伊在

大中丞翫月小飲用先少保武昌闌中望月

韻三首

運際文明盛光華  
覺爛然從來桂輪月  
倍向棘闌圓夜半  
渾如晝秋中更得天  
莫輕拋此夕重度是三年

又

吳剛真足羨宋玉不須悲  
五色雲生處三條燭盡時  
飛霜開府肅明月下簾遲  
我輩從公暇清樽亦頗宜



又

冰輪應鑒我此念豈成灰縱未飛騰去曾經辛苦來  
所生終已忝有命敢言才當日秋闈咏年纔弱冠催  
先少保戊子典試三  
楚時年僅二十有二

秋闈紀事二首

簾分內外日沉沉三試防閒棘院深待士 聖朝真  
得體憐才末座頗關心衣冠莫廢持方節鼓角休催  
競寸陰唱到諸生名可忽臚傳天上即從今

又

淡墨明燈榜欲書臨時慎重幾踟躕連城壁恐微瑕  
累合抱材堪尺腐餘局外有情同愛惜衡中無物本  
空虛自誇亦助風雲力不是傍觀變化魚

曲阜 聖廟落成

上遣 皇子致祭恭紀盛典十六韻

夫子宮牆峻春秋俎豆遙代皆崇闕里典特重園橋  
但見翬飛築從無燕翼昭及時惟掌故將事止臣僚



知聖逢 今上興文邁列朝 鑾輿勤仰止 天仗  
儼招搖手植還攀檜身親爲奠椒禮成廻日馭帑發  
命星輶廟貌更神宇工材用 御窰豈徒新土木直  
欲麗雲霄役竣王官告種脩 帝念超萬年瞻盛舉  
六邸簡英標代祭虔同體尊師示覆髻儀看習圭瓚  
質可並瓊瑤北斗 宸章煥東平夙慧饒成均方齒  
胄寄語勉昕朝